

ŠENTENCIJA MESOPUSTA

PIĆURALO

SUDAC: RENE ŠEVERDIJA – TESLA

ABUKAT: DANIEL GRBIĆ

AUTOR: RENE ŠEVERDIJA – TESLA

SUDAC

Prvi stih tako gredu

Pozdravljan vas sih po redu

Si domaći i susedi

Va prvon i zadnjen redi

Ovoj praznik jedan veli

Za sav narod v našen seli

Vavo vrime smiron budi

I normalan svat poludi

Na male i vele vrata

Sako malo bumbarata

Subotun se maski kladu

Pa se tanca uz paradu

Staro mlaje ženi dica

Dok ne pride pepelnica

Bribirac se tin ponosi

I sakud va srci nosi

Zato pozdrav ki ste dalje

Mesopust van pusu šalje

Ne zabite običaja

Bribirskoga rodnog kraja

-1-

Još pozdravljan dicu školi

Od mala se ovo voli

Tribi daj to školi nauk

Kot povijest i vjeronauk

Za paradu čitan dalje

Najveći se pozdrav šalje

Na plećih su znesli ovo

Još ka ura paj gotovo

Pozdrav i za općinari

Pozdravlja je sudac stari
Od općinske zgradi sliku
To gren poslat načelniku

Ne gljeda ju on baš često
A gori muj radno mesto
Morebit se ča promini
Kad gorika vrtić fini

Prit će dica lipe tete
Pak onda konatit nete
Toj stara stvar ajme meni
Da načelnik voli ženi

-2-

Zadnji pozdrav s pozornice
Gre do naše precjednice
Još esad mij suza v oki
Sada gori sidi Zoki

Ćel ista takova srića
Pomazit i Plenkovića
Da ča krivo tu ne snesen
Glasat ćemo ovu jesen

Sad gren malo s pravne strane
Se ovlasti su mi dane
Ja to učin još od mala
Da bun ovdí za fiškala

To ne piše va statuti
Na vo niki me ne puti
Sudeć su san slavu stekal
Nijedan nij živ utekal

Dokazat ću kašnje malo
Daj za se kriv PIĆURALO
Sada oće toj na redi

Abukat reć dvi besedi

TAMBUR

-3-

ABUKAT

Napuhana vrićo sala

Na predstavi lipa fala

Leta su te već načela

A rakija pamet zela

Neć osudit PIĆURALA

Posvedočit oće sala

Ov dan dugo će se sinjat

Statistiku ću ti minjat

Ali prvo da pozdravim

I narodu se predstavim

Abukat san prva klasa

Obranin i kad nij spasa

Se vas grlin i kušujen

Grdo neću niš da čujen

Pozdrav simi ki ste prišli

Z vruće kuće malo zišli

I bolnoga se pozdravi

Neka čin prije ozdravi

Pozdrav našin ki su vani

Jel vas više nego lani

-4-

Niki ovdi me ne štopa

Da pozdravin našeg popa

Sudac nij se sital toga

Zač ne veruje va Boga

Ne zna kako zgljeda criki

Tamo nij ga videl niki

Nij se sital ni Plovana

Pokojnoga velikana

Ante Cindrić ime velo
Zaplakaloj celo selo
Zadnji pozdrav odovuda
Lahka ti bibrirska gruda

Vavon redi lipo piše
Daj baren takovih više
Siti te se i parada
Dokli sope okol grada

Va tvrdoj bibrirskoj steni
Ostat oće uspomeni
I na pljoči zlatna slova
Neka tende dica nova

-5-

Na ov proces sad se vraćan
Optužnicu baš ne svaćan

PIĆURALA duro krive

I z desne i ovi z live

Bribiru moj grade mili

Nij on kriv ča krule pili

Ni za lilki ni za pipu

Ni kinesku ovu gripu

Branit ću ga ja do škura

I do zadnjega tambura

Kletu oće va mačkare

Ako ga ki ne satare

TAMBUR

SUDAC

Na gubac ti teku slini

Sil nedavno bil va Kini

Virus tej ujil korona

Evo ti se smiju zvona

Zaražen si to se vidi
I ov uzate ča sidi
Ovo će bit moja slava
Kad obindvin padne glava -6-
Povidit gren sada malo
Kad sej zlegal PIĆURALO
Općinska se vlast složila
Da bi centar uredila

Bribiri mijat frizuru
I facadu i monduru
Da bu centar od općini
Lipši starcu i dičini

Nacrti su gori bili
Va vječnicu posložili
Pa sej moglo to nen lagat
I drukčije ča predlagat

Samo jedan sej potrudio
I svoj nacrt je ponudio
Ma na pamet nij mu palo
Kuliko bi to koštalo

Jednosmjerne kružni toki
To nij crtal on na soki
Štirna koda ostakljena
Još i placa natkrivena

-7-
Lipoj crtal Perin Mata
Ma zalih tu nij od zlata
Delat će se moj nebore
S kuliko se pokrit more

Prvi bager kad je prišal
PIĆURALOJ s kući zišal

Pa od rana se do škura

Samo kvoca i pićura

Zač sej cistu tu suzilo

Zač sej lilki popililo

Kamo ste odnesli pipu

I topolu staru lipu

A još da ga jako srbi

Kamo stoli te spred Vrbi

Čoće nan tuliki znaki

I prelazi za pješaki

To ne triba poč studirat

Kadi oću sad parkirat

Dok san šetal biloj hlada

Kadij stari lilak sada

Jednosmjerna okol grada

Va ki smjer oće parada

Još i vrtić va općinu

Se u pičku materinu

Išće moja glava stara

Ki da zato odgovara

Još jednuč sej pokazalo

Daj za se kriv PIĆURALO

TAMBUR

Tužujen ga ovdi valje

Ne vidi od nosa dalje

Kako svatit on ne more

Ne dela se da bu gore

Na fejsbuki sej videlo

Ki ne voli svoje selo

Još čagod napisat umin

Ne pačan ča ne razumin

Napisat ja moren slovo

Onda kad bu se gotovo

Ki bi simi nan ugodil

Ta još nij po zemlji hodil

-9-

Komu stari lilak rabi

Neka doma ga posadi

Ovomu su zišle žili

Podorihon na perili

Onaj manji bil je stigal

Čekaonu vajer digal

Ja se nato neću jedit

Drugo će se drvo sadit

I pipa će bit na slici

Sazidana va kamiki

I štirna od Frankopani

Dočekat će lipši dani

Za sidit te bit klupice

I svitit te sijalice

Slika lipša da ostane

Bandić šalje dvi fontane

Gljedat ote i turisti

Jel ovo on Bribir isti

Sakomuj ta slika lipa

Samo mi smo čeljad slipa

-10-

Neka se i ovo čuje

Namij lipše se čaj tuje

Pak se ovdje ljudi čude

Nakon dvajst let zač nas bude

Nikomuj šla kost va grlo

Ča sej kolo obrnulo

Ne voli to naše selo

Smeta nan kad krene delo

PIĆURALO već ne išće

Kadij dič je igrališće

Zada starog partizana

Dič ja kula sazidana

Vrtić gradi mi ne smeta

Delo će ocjenit teta

Bit će novo puno veće

Prigovora imit neće

Sad se stišću vidi čuda

Kot i na vičeri KUD-a

Kasnije sej to doznalo

I toj skrivil PIĆURALO

-11-

ABUKAT

Grde riči moran birat

Da bi šal to komentirat

Bribirskin se pismon služin

Se dokli se ne opružin

Poslušaj besedi moje

Na kraji se mrtvi broje

Šaljen žalbu odovuda

Se do vrhovnoga suda

Dok črno ne bu na belo

S paradun ja gren va selo

Pozdravlja se dolnja strana

Natresuljaj u Milana

Pitan se jel živ ki kadi

Čaj šnjini počel va paradi
Za njegaj to delo sveto
Proval je i ovo leto

Ziskubal je z glavi pera
I nij zdural do Kičera
Na binu se neće popet
Ma će kletu provat opet

-12-

Paradaj u Jeri bila
Već je noć je ulovila
Kamo ote na vičeru
Antoncimi ili Meru

Sad je vrime virtualno
Minjaju se slici stalno
Lipu sliku saki voli
Enoj Roko v karijoli

Polegnut je va kolica
Na prsij mu j tabelica
Na sastanki su doznali
Ko su selo pozdravljali

Drugi vikend to j milina
I Podgori i Kričina
Popravila in sej forma
Do dnevnika to daj norma

Niš da nisu još ukrali
Ni razbili ni važgali
Čudno dahnu a ne piju
I jako se puno smiju

-13-

Vuku travu čudna diha
Ka tira na puno smiha
A vole hodeć kroz selo

Va nos povlič čagod belo

To su čudne molekule

Pak su oči kot špekule

Daj to lik za žgaravicu

I proljev i nesanicu

Ča su vukli pitan dicu

Kad su prošli Kraljevicu

Tamo nete se zabavit

Ledenicej za pozdravit

Jednuj nošnju tako velin

Malo bil prevaril pelin

Pak je bila Bože sveti

Zadrimala va šekretu

Sul pušili sul šmrkali

Ili su se nasrkali

Pak su prošli s Kraljevice

Bez Tine va Ledence

-14-

Kasnije mij povidela

Noć zahodij presidela

Pak ju taksi doma vozi

Va Ugrinuh žive Brozi

Za paradu vavon leti

Se pofale i paketi

Ma pročitat moran sada

Poručuje to parada

Zanoga kij farbu mišal

Grdo si nan se zapišal

Ovo tij već drugo leto

Da pituraš čaj nan sveto

Šlaj črvljena farba gusta
Na spomenik mesopusta
Šće su ruki tamo bile
Da Bog da se osušile

Ki si ako to se sazna
Ščekuje te lipa kazna
Progutat ćeš farbi pijat
Kuća će ti nebo grijat

-15-

Na milost te molit usta
Paradu i mesopusta
Morda Bog te blagoslovi
Bit oć važgan na Ćokovi

TAMBUR

SUDAC

Neka reši to parada

A ti brani svoga gada
Jel bil tamo PIĆURALO
Kad je črišnje se pokralo

Kičeri gren gornje selo
Ne gljedaj me tako belo
Vela črišnja puna roda
Rajko blizu živi koda

Vlasnici to velin sprotu
Već zdavni ne žive totu
Ali vnučad oću dodat
Voli zrele črišnje zobat

Bakaj v Novon Vinodoli
A dičica metropoli
Brižna žena sina šalje

Hodi nabrat črišanj valje
Otela bin poslat dici

-16-

A i bivšoj nevestici
Suseda mij to javila
Jako lipo daj rodila

Košić veli košić mali
Auto se sprotu pali
Pripeljal je odozdola
I dvi kanti od jupola

Napunit oće kalači
Za zobat i za kolači
Maj bil spazil to od šuba
Daj na črišnji nišća stuba

I još mu se čini koda
Da nij nijednoga ploda
Pobrala jej tuja ruka
Kraj stubicej tu i kuka

Auto se tu okreće
Ma prazan va Novi neće
Ako stubu sobun spravi
Morebit se ki god javi

-17-

Već nij doma staračkoga
Kadij prizor od ovoga
U koga se črišnje broje
Rajko nij zač ima svoje

Doznalo sej mor nij greda
Daj to stuba od suseda
Nij neg nasmet se ovomu
Još je vavik va Novomu

TAMBUR

ABUKAT

Nisi valjda zabil asi

Prvaci va svojoj klasi
Nij to zdavni mi se čini
Trefilo sej Poduljini

Vavoj noćnoj premijeri
Bribirski su rekorderi
Renol Roberta Jurčića
Krenul je od Pećarića

Z Njemačkej bil stigal Goran
I to još povidit moran
Kuliko sej tu noć pilo
Kašnje sej utanačilo -18-
Vozi Robi odozdola
Ma ne pazi na renola
Niš ne mota majko moja
Kadij živel Božo Spoja
Ki zna jel ni bi va moći

Va to gluho doba noći
Mi se čini da promili
Mesto njega su vozili

Paj umesto prema gradi
Finil doli va livadi
Bil renolić stal na boki
Da su tu noć pili soki

Stanarka se za sna budi
Renol ju va vrti čudi
Ćel se zvlić ki živ z renola
Oće nazvat hitna kola

Nij znala da te va turi
Zada hitne prit panduri
Roberta su vižitali
Nisu puno ga pitali

-19-

Mora puhat mili Bože
Vetra nij a on se vože
Vijest Bribiri brzo kola
Do Zubinaj prišlo stola

Tu Skočilić pije Mile
I Siniša šnjin je Žile
Za nezgodu su doznali
Žile sprotu skuter pali

Kamo letiš Mile zija
Mor je doli milicija
Žile koda nij čul ovo
Voli pomoć i gotovo

Leti zdolu nima brigi
Na motori bez kacigi
Ja san dobro informiran

Ta motor nij registriran

Pandurimi fale bodi
Pa mu vele simo hodi
Dali su mu puhat frulu
Ni opolne ne bi nulu

-20-

Aparatić lipo miri
Tri cela i trejst četiri
Jel mu bilo to za lazna
Oplela gaj vela kazna

Miluj puno put opeklo
Pa mu se nij zdolu teklo
Lipšej ostat s karlovačkun
Neg pozdravit se s vozačkun

TAMBUR

SUDAC

Eve harti tako pišu

Još je jedna za Sinišu

Mili Bože blagoslovi

Ovoj bilo na Lukovi

U Krsti sej nič zidalo

Uz delo i natakalo

Ne znan kaj to bila ura

Kad je kladena glazura

Brzo će se škuro spustit

Pa se moru i opustit

Stanjej bilo mi se čini

Jednako ko Poduljini

-21-

Va niku se doba Žile

Otputil do svoje vile

Popuštaju se mu moće

Za Košičen nanat oće

Jel bil usnul sanak ludi

Mobitelon Krstu budi

Zvoni zvono na uzbunu

Zač da ima kuću punu

Išće pomoć od Ivice

Da v kući su izbjeglice

Puna kuća Žile zija

Neka pride milicija

Na petri su i v auti

Si črni i jedan žuti

Ni Krsta nij svoj na svomu

Ma gre posvedočit tomu

Interventna stiže valje

A ča da van pravin dalje

V kući živoga nij krsta

Neg Žile i Ive Krsta

-22-

Zapisnik su na stol klali

Oba su ga potpisali

Tebe su napali duhi

A na petri šeću puhi

Dohtori pak zgodu ovu

Stručno da delirij zovu

Kad ti nisu si na broji

I gljedaš ča ne postoji

TAMBUR

ABUKAT

Cukar se za kraj ostavlja

Da se to ne zaboravlja

Esada mij na pameti

Daj to bilo lani v leti

Okol sedme ure rane

Na delo gre Jovin Frane

Žgaravica muj na ciklu

Spazi dvoje na beciklu

Mahali su mu da stane

Oće je poslušat Frane

Na grmovi žena kaže

Niki tamo zapomaže -23-

Ča vi znate još ste dica

To su čaglji i lisica

Ja gren nutar ti me prati

Tako san i Liki v rati

Zad grmova motor veli

Spod motora brki beli

Da ti jeben sunce žarko

Pod motoron poštar Darko

Poglavniče sil najebal
Jel te metkon ki ukebal
Od kada tu paseš travu
Dobro nisi zgubil glavu

A ča da ti sada pravin
Kad ja brzo zaboravin
Pogodil san vavo drvo
Makni z mene motor prvo

Srića lovci tud ne mlate
Volja ki bi pucal va te
Motor cel je nima kvara
Pomalo će v Rošće Dara

-24-
Dofuzal sej on do kuće
Rani su još jako vruće

Ma za krevet gaj pribilo
Kad sej telo ohladilo

Preležal je šetemanu
Ni popačal nij va Anu
Stigal sin je Bogu fala
Pa ga pelja do špitala

Dohtor se pak tamo čudi
Od ovoga vrište ljudi
Ne moreš pomaknut telo
Ni jedno nij rebro celo

I ključnaj kost evo vani
Kadi ste tuliki dani
Dogajalo sej i prija
Bin zacelel kot i zmija

Par dan je bil va špitali

Košćine su namešćali

Poštelane kosti stare

Sada more na mačkare

TAMBUR

-25-

SUDAC

Medecina ovo taji

Virus je i v našen kraji

Cvilil san kad je korona

Pokosila nan Nerona

Ovo se pojasnit mora

Toj kucak od Dadi Čora

Od Dadi i od Tićaka

To da in je s prvog braka

Strenirano blago velo

Lukovo daj čuval celo

Migranta bi poznal z duga

Celoj šumi sada tuga

Na Maševi i na Kali

Nij čovika ki ne žali

Jel i do vas prišla slika

Sprogod kot i za čovika

Komunist je bil po rodi

Zato sprogod pop ne vodi

Na Lukovi na livadi

Ispraćaj je poli Dadi

-26-

Enej sope zadnju notu

Prijatelji si su totu

Tu su Vesna i Ljubica

Otac mat i oba strica

Kata slika s aparati

A Petar je na lopati

Ki ga nosi reč se mora

Toj dužnost od profesora

Ima ime moj nebore

Kot i naše plavo more

Ki Jadrana ne poznate

Sliki će pokazat Kate

Počasti su bile vojne

Ne znan točno s kej bil bojne

Puškaj tri put opalila

Lahka tij zemljica bila

Kašnje bil kotal fažola

Odojak i koka kola

Uza to da kola prija

I virusi si ubija

Valjda znate daj to šala

Kola nij se opirala

Poteklaj cisterna vina

Tri dni traje umrlina

TAMBUR

Sada oću se na miri

Ja prošetat po Bribiri

Neka vavon štivu piše

Kako staro selo diše

S Kričini gren ja pišice

Deset ljudi troje dice

Mica Nina Požarići

Meri i Blažičevići

Dva Čora pa još do Cani

Drugo da su muslimani

Nove kuće podelali

Čudnun bojun je farbali

I reklama na facadi

Vidiš da si lipo gradi

Celu zimu se ne gasi

Kot i da smo va Vegasi

-28-

Va Podgori škripe vrata

Već ni tamo nij zanata

Auti su danas zdravi

Braco se turizmon bavi

Ne nosi se radna halja

Ni doli u Frani Špalja

Radionu kadij delal

Va konobuj bil predelal

Od Pećurišć do Dolčini

Ni tuda već nij dičini

Ni pismi nij čut kroz selo

Kodaj selo zanimelo

V Rošći zdavni nij marksizam

Tamoj elitni turizam

Uzidani su bazeni

Pak se kuplju gole ženi

Dragaljin i Kavranica

Tamo ne znaš ča su dica

Srest oćeš Zlatana samo

A ni on ne zna daj tamo...

-29-

Pozdrav njemu i Evici

Miri Braci i Štefici

Ćuku Senki Nadi Želji

Voji Bosiljki i Velji

Gradac prvo mesto drži

Spermići su tu najbrži

Tu ne vlada kuga bela

Punoj dice s toga sela

Od Čokova do Pilani

Kad je lipo si su vani

Tamoj centar industrije

Obrta i pizdarije

Plin va boci bravarija

Poneštire i stolarija

Mramor pljoča ajme meni

I vešeraj u Heleni

Buće se igraju v seli

Prvi da smo na tabeli

Da ćemo va ligu više

Voja već transferi piše

-30-

PIĆURALO tako veli

Simi pusa va ton seli

Da ostane to va stih

Ja gren popit poli Tihi

TAMBUR

ABUKAT

Kosavin je tvrda stena

Jebeš selo bez Lepena

Prija njega to priliči

Pozdrav Ljubi va Škodići

Lipi pozdrav od Udrugi

Želimo ti život dugi

Fala za se napisano

Zauvik je sačuvano

Podugrinac i Jargovo
Već trejset let ništa novo
I Mikula minja značku
Mirko šal je va Njemačku

Poduljini mila mati
I tamo su stari svati
Jedno dite u Gašpari
I dva veći u Barbari -31-
Kičeri zavavik dika
Jer je dalo Pukovnika
Da nis čital ja njegovo
Ne bin nikad pisal ovo

Udruga mi tako veli
Precjednik je va ton seli
Od nigdaj to selo malo
Puno kapetanih dalo

Svetin Vidon gren prošetat
Kemičarih neću smetat
Na ton delu od Bribira
Tu se voće destilira

Na šće ime ovo glasi
Tamo kotal se ne gasi
Od sega te skuhat majko
Vina Depić Stanić Rajko

Kroz Ugrini ću poprišit
Kobasice gren podišit
Puno put mij mera zeta
Dvi konobi dva Potpleta

-32-
A da bude se pošteno
I tretu opira Deno
Samo da se ča ne zruši

Da nan vrelo ne presuši

Gornje selo v prvon redi

Da gaj sused klal susedi

Daj istina vele ljudi

Oće finit to na sudi

Neka se i to dočuje

Da još niko podmazuje

Proval bi i PIĆURALO

Akoj kadi još ostalo

Malo tlak mij od visina

Isto gren do Duješina

Tu RTL ljudi dragi

Život snima ma na vagi

Ne smetaju in kurtoni

Na bribirskon jebodromi

Lipo gori su vježbali

Se su srni potirali

TAMBUR

-33-

SUDAC

Va Štale gren moj narode

Tamo Tusi kolo vode

Carići i Mandičini

Ki će više pilotini

I turizam nosi bodi

Ne znaš kamo simo hodi

Lipi bazen na srid sela

Poli Diki Danijela

Ča su tamo gosti pili

Va novinah su finili

Biloj krvi do kolena

Kaj koščica prebijena

Ne znan da su samo pili

Zač pol kuće su razbili

Prnesli su nova vrata

A ča daj bil doma tata

Još je čardak na vrh sela

Peto leto već se dela

Par bazeni ka god vila

Više Stevi i perila

-34-

Do centra gren Bogu fala

Čut čagod od PIĆURALA

Pametn je Bože jako

Da smo bar si drugi tako

PIĆURALO savjet daće

Ima on i puno braće

Inžinjeri i merčini

Vjutro rano na kafini

Vraćaju se va grad dica

Zapivat će i Štrkica

I Frankici čaj od Ćuka

Sako jutro prit će vnuka

Poručuje odbor mjesni

Kronpiri ne jimo presni

Neg je v nami puno volje

Da nan selo zgloda bolje

Ne bin otel dušu grešit

I parkplac se oće rešit

Ovo pravin jer vas volin

Za malo strpljenja molin

-35-

Autor se pita stari

Kaj sudbina od pekari

Zdavni se ne pali peka

Nij več Dilji ni bureka

Promjenaj Bribiri fanjska

I znutri ne samo vanjska

Valjdaj to narodu drago

Nij kuće ka drži blago

Nij več kravi ni teleta

Ni kozi ni magareta

Ni prča nij ni ovčice

Ni jareta ni prasice

Par kokoš u Ligatića

Dva gardelca u Pekića

Samo mački i kucini

Ma to žeru samo v Kini

To me jako stišće v prsih

Tri su črišnje i šest trsih

Još oć opazit s kuli

Dvi gredice od kapuli

-36-

A zeli za na bandiri

To već nećeš nać Bribiri

Dvi su murvi cibor jedan

Oskoruši već ne gljedan

Ki kronpir još v gori sadi

Na red za špital ga kladi

Merljin zeli cikla fina

To prnesu z Ogulina

Ako rabiš govedine

Moraš skočit va Plodine

Da bi jutro bila juha

Čera kladi da se kuha

Ako kupiš letilice

Toj kot nogi od stolice

Još je kladi va fritezu

Po novu moreš protezu

Hrenovku kad daš ditetu

Celi dan je na šekretu

Povidit ću ovo tiše

Da i govna čudno diše

-37-

To su samo naši grihi

Ča nij blaga već ni lihi

Pak se narod onda čudi

Od žerila kad poludi

Na žalost to evdi piše

Da nas bolnih je se više

Mogal bin se sprotu kladit

Opet će se morat sadit

Doma blago još uzgajat

Pak očemo duže trajat

Kad bu opet kravljeg mlika

Bit će lipša krvna slika

TAMBUR

Evo proces je na kraju

Još ih je ča pićuraju

Ako telo tin se hrani

Autor in to ne brani

Ćel pofalno past ko slovo

Kada delo bu gotovo

Il bi raje razglednicu

Žičaru za na Slipicu

-38-

Ne smeta mi v jaji dlaka

Ni na domi petokraka

Ki ne voli da se dela

Kletu bit će šansa vela

Kad se doma vrnu lasti

Birat će se nove vlasti

Ovo će nan bit prilika

Da se vrne stara slika

Triba vrnut se na staro

Pak će nan bit lipše čaro

Nete smetat nan bageri

Kamijoni pikameri

Tribij maknut igrališće

Partizanskoj to zemljišće

Šest lilkih posadit znova

I na brdo vrnut slova

Posrat se po staroj štirni

Dvajset let smo onda mirni

Zasapal san si očala

Gren se rešit PIĆURALA

-39-

Ča si kvocal i pićural

Dobro si do sada dural

Kapetane sablju spravi

A ti gori sih pozdravi

(UDARAC SABLJUN)

TAMBUR (bez muzike)

-40-

OSTAVINA

ABUKAT

Pred manun su dani dugi

Se va jadi i va tugi

Kako oću dalje živit

Kad se niman komu divit

PIĆURALO brate mili

Parada za tobun cvili

Nij čovika ki ne žali

Ča bez tebe smo ostali

To daj tako od davnini

Pročitat čaj v ostavini

Za životon čaj ostalo

Moran priznat ako malo

Udrugi ča ovo bati

Dal je vino da se plati

Blitvov prisnac komu paše

Da pojidu iza maše

Kapetanon diktaturu

Da Cupaču najdu curu
Crticu još tu dodajen
Vele dobro daj nasajen
Za paradu zač je voli
Brzi tečaj plesne školi
Da se ovdi ne zgražaju
Nošnje same da tancaju

-41-

Promini se to doduše
Ako dobro se napuše
Ranun zorun tu se tanca
Koda su utekli z lanca

Roki kauč dvi dekice
Kad prespi zad pozornice
Još paradi su dva zvonca
I čineli za Antonca

Tuče v dičje uz magarca

Grižanih u Tomi Barca
Do tamo smo kampanali
Popili se ča su dali

Za nošnjice se pofali
Jednu smo Novljanon dali
Antonija prave dica
U Žanić je nevestica

-42-

Skoroj već finila ova
Za Lepena niti slova
Ki se na to pak još kladi
Daj najbolji va paradi

Kad je v krili tuja cura
O tomu se ne pićura
Ova z mojih ust nij zišla
Daj s letimi pamet prišla

Za KUD samo vela pusa

I plaćena dva tri busa

Ovo leto plani veli

Sakamo se Bribir seli

I lani su prošli dosti

Na Alki su bili gosti

Alaj Čauš sablju nosi

Prvon redu maše Bosi

Sridu sej gađalo malo

Zač va Bosu sej gljedalo

Kako nete bute zdravi

Vikleri su joj na glavi

-43-

I kučice žuta boja

Si fulaju majko moja

Cin cin cin ne znadu oni

Tako sveti Martin zvoni

Sitil sej i baki Biki

Nju ne more minjat niki

Jebite se kandidati

Tu su novi dva mandati

Daruje joj praksiteni

Kad na advent pelja ženi

Va Ljubljanu gre elita

Vanja gre i mat Anita

Bika oće dirigirat

Prvo gre se šopingirat

Neka nikamor ne žure

Opet ovdi za tri ure

Lipo koda si je navil

Veli šoping sej obavil

Triba krenut čriva krule

Dvi se nisu još vrnule

-44-

Kad je prošla školska ura

Stiže mama i nje cura

Biserka in skida Bogi

Od vas san dobila rogi

I ov čovik ča nas vozi

Nikad više mi se grozi

Jutro to na fejsbuk kladi

Šoferu ni cikuladi

TAMBUR

SUDAC

Općinaron rukuj pružil

Pred smrt na nje nij se tužil

Ostavinaj napisana

Na tjedan tri radna dana

Šentenciji tako piše

More bit i toj previše

Veli plani moj nebore

Neka malo i odmore

Za Davora ostavina

Doživotna mostarina

Neće sam bit kot i prije

Tuj divojka z Bodulije -45-

Šesna vridna i poštena

A i dobro baždarena

To daj važno prave dica

I za tatu i za strica

Još sej sital dva junaka

Dadi Čora i Tićaka

Čistokrvni kucak novi
Da je čuva na Lukovi

Prije nij bil na priliki
Da pošalje do Uliki
Pelinkovca dva kartona
Toj od KUD-a bez pardona

Kad si stišćen kot sardina
Ne smeta ti akoj vina
Ali žensko pelin voli
I za ov put palac doli

Još se evdi kritizira
Trgovkinje iz Bribira
Kad riblje konzervi slažu
Zač je lipilon namažu

Lipilaj konzerva puna
Posebno va koj je tuna
Pak vide i ki su slipi
Da se to za prsti lipi

Sad smo dosta pićurali
Sega totu smo nasrali
Kad nij v seli pizdarije
Nij poštene šentencije

To zna on ki ovo prova
Same se ne slažu slova
Autor za kletu želi
Da ste zdravi i veseli

Malo više kurbarije
I da se čin više pije
Gren prošetat asfalt novi
Vidimo se na Čokovi

TAMBUR
KRAJ

IN MEMORIAM
VLČ. ANTE CINDRIĆ
ROĐEN 14.9.1940. U ZAGORJU OGULINSKOM
UMRO 24.11.2019. U RIJECI.

ŽUPNIK BRIBIRSKI
1972.-2014.

-47-

UDRUGA ZA MESOPUSNE OBIČAJE BRIBIR ZAHVALJUJE

SVIM SPONZORIMA A POSEBNO:

NARODU BRIBIRA

ŽUPANIJI PRIMORSKO GORANSKOJ

OPĆINI VINODOLSKOJ

TURISTIČKOJ ZAJEDNICI VINODOLSKE OPĆINE

TURISTIČKOJ AGENCIJI KATARINA LINE OPATIJA I OBITELJI

HAUPTFELD

KTD VODOVOD ŽRNOVNICA

IVICI ROSU
